

**Месяца ноембрия в 5-й день**  
**Святых отец Поместного Собора Церкви Русския**

**На малей вечерни**  
**На Господи возвах: стихиры на 4, глас 4.**

**Подобен: Званный свыше:**

**Приидите, вернии,/ похвалами и песньми увенчаим/ мученики и исповедники,/ святители и преподобныя,/ отцы единомудренныя,/ первее на Соборе Церкви Русския потрудившыяся,/ послежде гонения за веру Христову претерпевшыя/ и Церковь Русскую подвиги своими украсившыя./ Приидите, воспоим поборники ревностныя/ и завет их услышим:/ о, чада, храните веру Православную,/ в нейже земли наша утверждение.**

**Званныи свыше/ возвестити во Отечестве нашем/ соборнаго разума глас,/ народа Божия избранницы,/ единокорнии страдальцы вернии,/ совесть добру имущии/ и мир Христов в себе носящии,/ исповедницы и мученицы,/ венцы нетленными увенчанныи/ и Троицу Единосущную прославившии./ Юже прилежно молитесь/ на подвиг веры укрепити души наша.**

**Церкви Русския печальницы/ и веры Христовы ревнителие покажутся,/ святии отцы наши,/ вы бо, Промыслу Божию последующе,/ избранию Патриарха/ на престол Русский поревновасте/ и, Господа, яко Всевидца,/ тайны сердец ведуща,/ едина от трех достойнейша/ жребием Божиим указати умолисте,/ темже и в Церкви благочиние возстависте/ благословением соборным.**

**Светильницы церковнии явистесья,/ избранницы Руси Святыя,/ Священного Собора ревностнии делателие,/ новомученицы и исповедницы,/ во страданиях и гонениях веру Христову до конца соблюдшии,/ вы бо, Владимиру священномученику подобящесья,/ в бурю мятежную убиени бысте,/ Вениамину крепчайшему подражающе,/ от властей безбожных осуждение приясте/ и, якоже Петр местоблюститель, темничная заключения претерпесте,/ доблим Кириллу и Агафангелу последующе,/ во изгнаниях томими бысте/ и, якоже светлый Иларийон,/ во стане страданий поживисте/ и Бога твердо исповедасте./ Егоже молитесь о верою совершающих святую память вашу.**

**Слава, глас 2:**

**Союзом любве Христовы соединени/ и Духом Святым во едино собрани, святии,/ именем Патриарха Тихона украсились есте./ В годину же гонений,/ завет его исполнивше,/ достойно пострадали есте/ и, гоними бывше, яко ученицы Христовы,/ заключение и убиение претерпели есте./ Тех молитвами, Господи, спаси души наша.**

**И ныне, Богородичен.**

**На стиховне, глас 8:**

**О, крепости ваша,/ новомученицы и исповедницы!/ Вы бо, в темницах и заточениях томящесья/ и на смерть мучителями ведомии,/ молитвами святых Земли Русския/ сердца своя на камени веры утвердисте/ и словесы Афанасия гимнотворца радостне воспевасте:/ Русь Святая, храни веру Православную!**

**Стих: Восхваляться преподобнии во славе,/ и возрадуются на ложах своих.**

**О, твердости ваша,/ новомученицы и исповедницы!/ Вы бо, смирением и ревностию раны раскола врачующе/ и мудростию болезнь разделения исцеляюще,/**

страданиями единомыслие в Церкви гонимей яviste./ Темже молим вас, христороубцы добропобеднии:/ помозите нам глас истины присно разумети.

**Стих: Возношения Божия в гортани их,/ и мечи обоюдоостры в руках их.**

**О,** братолюбия вашего,/ новомученицы и исповедницы!/ Вы бо устроения жития церковнаго ради/ Собор составили есте,/ послежде страдания и смерть вкупе восприяли есте,/ научающе нас житие благочестне провождати,/ упование на Господа возлагати/ и смерти от безбожных не страшитися.

**Слава, глас тойже:**

**П**астве Церкви Русския святой Собор завета,/ никогдаже отрекаться гонимых за правду Божию,/ но имена их, яко бисер многоценный,/ усердне хранити помяновения ради./ Мы же, очима на лики новомучеников благоговейне взирающе,/ житию их да потщимся ревностне подражати,/ во спасение душ наших.

**И ныне, Богородичен: Владычице, приими:**

**Тропари писаны на велицей вечерни.**

**На велицей вечерни**

**На Господи, воззвах: стихиры на 8, глас 1:**

**Д**а восхвалим днесь святого Патриарха Тихона,/ на путь исповедничества избраннаго,/ иже с паствою Русскою/ чашу страдания испи за веру Православную,/ и сице воззовем ему:/ первосвятителю отче наш,/ прииди и осени верныя люди/ благословением небесным.

**Б**рань братоубийственная, глад и кровная смута/ жребий твой тяжкий явися,/ святителю Патриарше Тихоне!/ Ты же, в покаянии путь спасения всем указуя,/ людем, во озлоблении сущим, взывал еси:/ возлюбите ближняго своего,/ обратитесь ко Господу, и спасетесь.

**К** пастве твоей взывал еси,/ святе Тихоне Патриарше:/ сыны мои и дщери во Христе,/ потщитесь с проповедию покаяния,/ противустаните врагом Церкви силою веры нашея,/ не убойтесь тяжких страданий,/ памятующе словеса святого апостола:/ кто ны разлучит от любви Божия?

**С**традания многая претерпел еси, отче Тихоне:/ оклеветания, суды и заточения,/ предательства лжебратии и угрозы смертныя,/ насильства и нападения врагов Церкви Христовы,/ но пребыл еси мужествен и кроток, вещая:/ не ожесточайте сердец ваших,/ но возмогайте о Господе!

**Ины стихиры, глас 5:**

**Д**несь, вернии, восхвалим святителя Владимира,/ иже у стен лавры Киевския от рук беззаконник смерть прият,/ о немже глас плача отцы Собора/ в первопрестольнем граде вознесоша/ и всем, за веру Христову во дни гонений пострадавшим,/ память церковную оставиша,/ яко новомучеником и исповедником Церкви Русския,/ в ихже чине и сами послежде прославишася.

**С**вятейший Тихон во устах наместники себе поставляет,/ святители изрядныя Вениамина и Агафангела,/ помале же первый на беззаконнем судищи к смерти осуждается,/ другой же, паству призывый,/ еже глас волков, губящих стадо, отвергнути,/ в пределы северныя абие изгоняется./ Оба сия адаманта твердейша,/ путь страдания за веру Христову в гонениях нам показующа,/ днесь светло в песнях прославляются.

**Ц**еркви Русския вернии послушницы даже до смерти,/ Петр и Кирилл священномученицы,/ святителем Тихоном блюсти Престол Патриарший

благословляются,/ обаче един изгнание и в темнице пребывание неисходное прият,/ второй же препровожден бысть от гонителей в пустыню Туруханскую./ Оба сия, Духом Святым укрепляеми,/ единства ради Церкви Русския/ мученического венца сподобишася.

**О**, святити отцы, первомученицы Собора Поместнаго Церкви Русския,/ подвига Андроника и Гермогена подражателие!/ О, рыбарие богословцы соловецстии, Илариона славнаго сподвижницы!/ О, страдальцы бесчисленнии земли Зырянския, Нарымския и Туруханския!/ О, жертвы чистыя,/ в ровех Бутовских и по всей земли Русстей со архипастыри упокоившиися!/ Имена ваша на Небесех написана суть/ и в лице новомученик и исповедник Церкви нашае ныне прославляются.

**Слава, глас 8:**

**Царь Небесный**,/ Божественное Слово и Премудрость сице рек:/ аще кто Мне служит, Мне да последствует./ Темже и вы, святити отцы Священнаго Собора,/ избраннии от людей церковных,/ яко в добродетелех преизящнии,/ на земли во одеяние нищеты Христовы облекшеся,/ темницы, узы и поношения за Христа претерпели есте./ Ныне же, на Небеси веселяшеся,/ молитесь о чтущих любовию память вашу.

**И ныне, Богородичен, глас тойже: Царь Небесный:**

**Вход. Прокимен дне. И чтения новомученическая.**

**На литии стихира, глас 3:**

**Глас** святыя Церкви Православныя/ во дни разорения Руси вопиет, глаголя:/ приидите, чада верная,/ примите даннаго вам от Бога предстоятеля,/ приидите, послушайте отца вашего,/ приидите и видите на всяк день умирающаго,/ приидите, словесем того последуйте/ и припадите ко Христу, из глубины души моляшеся:/ сохрани, Господи, на Руси веру Православную,/ молитвами первосвятителя Тихона/ и мучеников и исповедников Церкви нашае.

**Слава, и ныне, глас тойже: Без семене от Божественнаго Духа:**

**На стиховне стихиры, глас 4.**

**Вере** в людех оскудевшей,/ любви истощившейся,/ надежди иссякнувшей,/ попусти Господь/ мор жесток, болезнь и глад на люди Отечества нашего./ Ты же, святителю Тихоне,/ святыни Божия от поругания неверных защищая,/ о страждущих болезновал еси/ и к милосердию и жертве посильней/ от щедрот своих для оных/ паству Русскую призывал еси.

**Стих: Господи, Господь наш**,/ яко чудно имя Твое по всей земли.

**Божественное** смотрение о тебе исполнися, святителю Владимире,/ егда к пастырскому деланию призва тя Господь,/ таже и святительством увенча/ и души словесных овец твоему попечению предаде,/ да соблюдеши я во едином стаде/ Единаго Пастыря Христа Бога нашего.

**Стих: Святим**, иже суть на земли Его,/ удиви Господь вся хотения Своя в них.

**Измлада** неленостно поучаяся в законе Господнем,/ чистою любовию к Богу возгорелся еси/ и мученическаго подвига желанием уязвился еси,/ священномучениче Вениамине,/ святителю славный Церкви Русския./ Егда же приведе тя Христос ко жребию оному,/ ничесоже убоявся, благодарне рекл еси:/ слава Тебе, Богу нашему, во веки.

**Слава, глас 8:**

Друзи мои есте, рече Господь учеником Своим,/ аще заповеди Моя соблюдете./ Вы же, отцы Собора Церковнаго,/ в темницах и изгнаниих нищете евангельстей навикше/ и чистоту сердечную и любовь нелицемерную стяжавше,/ заповеди Христовы усердне соблюдоште./ Сего ради житие ваше,/ братолюбия исполненное,/ дружество истинное нам являет,/ емуже научити нас усердно молим вы.

**И ныне, Богородичен: О,** преславнаго чудесе! Небесе и земли Царица:

**Тропарь святым отцем, глас 6:**

Днесь благодать Святаго Духа нас собра,/ прославити отцы Собора Церкви Русския/ с Первосвятителем Московским Тихоном,/ иже верныя люди земли нашея/ на подвиг исповедания правыя веры благословиша/ и страдания своими Церковь нашу прославиша.

**Тропарь святому Патриарху Тихону, глас 1:**

Апостольских преданий ревнителя/ и Христовы Церкви пастыря добраго,/ душу свою за овцы положившаго,/ жребием Божиим избраннаго/ Патриарха Тихона восхвалим/ и к нему с верою и упованием возопиим:/ предстательством святительским ко Господу/ Церковь Русскую в тишине соблюди,/ расточенная чада ея во едино стадо собери,/ отступившия от правыя веры к покаянию обрати,/ страну нашу от междоусобныя брани сохрани/ и мир Божий людем испроси.

**Ин тропарь святому Патриарху Тихону, глас 3:**

В годину тяжкую Богом избранный/ в совершенней святости и любви Бога прославил еси,/ во смирении величие, в простоте и кротости силу Божию являя,/ положил еси душу за Церковь, за люди своя,/ исповедниче святе патриарше Тихоне,/ моли Христа Бога,/ Емуже сораспялся еси,/ и ныне спасти землю Русскую и паству твою.

**На утрени**

**По 1-м стихословии седален, глас 3.**

**Подобен: Красоте девства:**

Красоту Православия возлюбивше, отцы святии,/ законов ради отеческих подвизатися вожделели есте/ и, от конец земли Русския стекшесе,/ яко народа церковнаго избранницы лучшии,/ деяния церковная учинили есте./ Темже похвалу ныне смиренно вам приносим,/ светильники веры именующе,/ и, дивящесе терпению вашему во страданиях, взываем сице:/ радуйтесе, древних мучеников ревнителие и подражателие.

**Слава, и ныне, Богородичен:**

Милосердому заступлению и множеству чудес Твоих/ страдальцы, во узах сущии, удивишася, Дево Богородице,/ посреде бо горьких бед покровом Твоим храними/ и благодатию Твоею светло утешаеми,/ молитвами, яже к Тебе, укрепляхуся./ Темже и глас ангельский приношаху Ти:/ радуйся, Благодатная.

**По 2-м стихословии седален, глас 2.**

**Подобен: Благоутробия сущи:**

Благоутробия Божия не разумевше,/ людие Русские от Господа отступиша,/ ты же, святыи Патриарше, призывал еси законы Христовы хранити,/ в нихже и сам день и ночь усердне подвизался еси./ Темже днесь сошедшесе, сице вопиим:/ радуйся, святителю Тихоне, лика новых мучеников начальниче.

**Слава, и ныне, Богородичен:**

Гонимых сущи прибежище, Богородице,/ Церковь Русскую от бед огради,/ на чада ея, Тебе молящаяся, призри/ и дела наша, во славу Божию начинаемая, благослови./ На Тя бо уповающе, с наставники нашими, новомученики и исповедники, вопием Ти:/ радуйся, Пречистая Дево.

**Величание:**

Величаем вас,/ святителю отче Тихоне/ и святии отцы Собора Церкви Русския,/ и чтим святую память вашу,/ вы бо молитесь за нас/ Христа Бога нашего.

**Псалом избранный:**

**Бог** нам Прибежище и Сила.

**Господи**, воздвигни силу Твою и прииди, во еже спасти ны.

**Тебе** ради умерщвляемся весь день, вменихомся, яко овцы заколения.

**Крепость** моя и пение мое Господь и бысть мне во спасение.

**По полиелеи седален, глас 8.**

**Подобен: Повеленное тайно:**

Повеленное в Евангелии начертав в разуме,/ в ризы священныя, яко любяй Христа, облеклся еси, святителю Тихоне;/ сказуя пастве слово утверждения,/ учил еси Церкви ради живота не щадити и даже до смерти во истинней вере стояти,/ юже словом молитвенным и крестным подвигом утвердив,/ с новомученики на Небесех взываеши:/ Пресвятая Троице, Боже наш, слава Тебе.

**Слава и ныне, Богородичен:**

Беззаконное тайно содевающе истязание,/ вину небывшую святым подписуют мучителие,/ но сокровенная вся яве зрит Господь,/ приклонивый снितिю к людем Небеса,/ и вечную славою свидетели Своя одевает,/ Матери Его Пречистой в скорбех вопиющая:/ Заступнице наша и надеждо, радуйся Невесто Невенчанная

**Степенна, 1-й антифон 4-го гласа. Прокимен, глас 4:** Приидомом сквозе огонь и воду,/ и извел еси ны в покой. **Стих:** Разжегл ны еси, якоже разжизается сребро. **Всякое дыхание: Евангелие от Матфея, зачало 36.**

**По 50-м псалме стихира, глас 6:**

Многострадальнии Руси Святые молитвенницы,/ многия души заблуждшия ко Христу обратившии,/ новомученицы, исповедницы и праведницы,/ Патриарха Тихона самовидцы и послушницы,/ заветам того верно последовавшии,/ лишения и скорби претерпевшии,/ молитесь ныне о чтущих верою и любовию/ соборную память вашу.

**Канон, глас 6.**

**Песнь 1**

**Ирмос:** Жезлом пророка разсечесе/ древле море Чермное,/ прехождение волн разделяя таинственно/ в погибель воинству мучителеву, верным же во спасение,/ песнь богокрасную воспевающим:/ славно прославися Христос Бог наш.

**Припев:** Святии отцы наши, молитесь Бога о нас.

Мглою безбожия помрачися Русь Православная, отступиша бо мнози от веры отеческия и отпадоша Небеснаго Царствия. Обаче Господь украси Церковь нашу, именем Патриарха Тихона нарицаемую, сонмом мучеников и исповедников Своих.

Смотрение Божие утаися от людей, умом помраченных, юзником царственным ругающихся; егда же слух убиения царева верных достиже, Патриарх со отцы Священнаго Собора молитву сотвориша, со дерзновением злодейство обличающе.

**О**, святителю Владимире, праведный и твердый душею, верный сыне Церкви Русския! Убиение твое у стен обители Киево-Печерския положи начало поминовения

соборного новых мученик. Ныне же, престолу Божию предстоя, молися Господеви спасти и просветити души наша.

**С**вятитель Пермский Андроник да почитается, веры Христовы светильник горяй, самодержцу отверженну сострадалец верный, паствы своя учитель усердный, мученик, еще жив сый, в земли погребенный, и, яко зерно пшеничное, плод сторицею принесый.

**З**аключение темничное Андрониково слышавше, мучениколюбцы святитель Василий Черниговский, и Матфей, пермских пастырей воспитатель, и Алексей, веры Христовы поборник, повеление соборное потщася исполнити об изъявлении убиения священномученика Пермскаго. Последи же за верность и любовь к собрату своему мученических венцев сподобишася.

**С**вятителю Христов Гермогене, града Саратова в вере утверждение, тобольския паствы мудрый наставниче, безбожных предателей же и крамольников обличителю. Ты, царственныя юзники крестом на страдания пророчески благословив, сам смерть мученическую чрез утопление приял еси.

**В**арлааме пречудне, иноков похвало и благочиния церковнаго ревнителю! Ты, яко Афон другий, Белую гору показал еси, и пределы Уральския подвиги твоими благодатно освятил еси. Мученический же венец прием, ныне молитвами твоими обитель твою укрепляеши.

**Богородичен:** Яко апостолов иногда, успение Твое чад Церкви Русския собра, Введение же Твое богоизбраннаго Патриарха во храм Господень введе, от всех воспеваемая, Преплага Мати Бога нашего.

### **Песнь 3**

**Ирмос:** *На твердем веры Твоя камени/ помышление утвердив души моя, утверди, Господи:/ Тя бо имам, Блаже,/ прибежище и утверждение.*

**Б**лагочестие на Руси погубити возжелевше, слову грозному Патриарха гонителю не внимаху и новых мученик кровь проливаху, обаче сия явися Церкви Русския утверждение.

**Д**а почтим, вернии, святителя Тихона, печальника гонимых и паствы русския утверждение, иже, властители злыя обличая и погибель тем предрекая, за страждущих и во узах сущих небоязненно предстательствует.

**Т**щание и благонравие твое в делех церковных уведев, священномучениче славне Лаврентие, архиерея тя святитель Тихон поставляет, обаче же без милости гонима тебе видя, судиям неправедным возопи: за кую вину чистаго на смерть осудисте?

**Х**ристови свидетелие и проповедницы святителие Ефрем со Николаем, муки приемше, радуются ныне на Небеси, с ними же и тысящи верных сликовствуют, яко не убояшася заступити отцы своя пред гонители.

**М**ужество и крепость почтим, братие, святителей Митрофана Астраханскаго и Платона Ревельскаго, иже лютых страданий не уклонишася, но мучение и убиение мужественно претерпеша.

**П**ричастницы Страстей Христовых явистеся, святити Тихоне Воронежский и Сильвестре Омский, яко дадеся вам благодать, не точию во Христа веровати, но и по Нем страдати.

**О**, священномучениче Симоне, благолепия древняго ревнителю, единоверия друже и единства Церкви Русския поборниче! Дерзновенною твоею молитвою, яко друг Христов, раны церковныя уврачуй.

**Богородичен:** Братоубийство кровавое слышавше, нецыи, яко безумнии, рекоша: несть Бог. Обаче попечением Христа Жизнодавца и молитвами Матере Его Пресвятыя врата ада Церковь Русскую не одолеша.

#### **Седáлен, глас 2:**

**Н**óвии страстотёрпцы Церкви Русския,/ мученически поприще земное скончавшии и страданиями дерзновение ко Господу приобретшии,/ молитесь Ему, вас укрепльшему,/ да и мы, егда найдёт на ны испытания час,/ мужества дар Божий восприимем.

#### **Слáва, и ныне, Богородичен, глас 4:**

**Не** премолчим присно, Богородице Дêво,/ благодарственно воспевати от сердца Твоя милости, Владычице, раби Твоя,/ вопиюще и глаголюще:/ Пресвятая Дêво, предвари, и избави нас от враг видимых и невидимых,/ и от нужды и всякаго прещения,/ Ты бо еси наше заступление.

#### **Песнь 4**

**Ирмос:** *Удивися Твой разум от мене,/ услышавшу преславная величия смотрения Твоего,/ укрепися же возлюблением Твоего схождения:/ Ты бо моя нищеты не отверглся еси.*

**О**, святе Патриарше наш Тихоне! Какое достойно ублажим верность тебе сохранивших, егда лжепастырие, гонителями наущаемии, яко властители законнии в Церкви, твоего отречения искаху?

**Г**ладу бывшу во Отечестве нашем, от братоубийства погибающем, пастыри увещавал еси, святителю Тихоне, Господа умоляти, да омыется земля Русская слезами покаяния и Святыми Тайнами да обновится.

**У**зы и судище, заплевание и клеветы, предательство и судей лукавых смертное изречение претерпев, о Церкви и пастве болезновал еси, святителю Петроградский Вениамине, мученики возлюбивый издетска. С ними же ныне Бога прославляеши.

**М**онашество и священство в час испытания Церкви Русския прияти не убоаяся, отче богомудре Сергие, священномученика Вениамина сподвижник верный явился еси. С нимже и осуждение несправедное и смерть мученическую претерпел еси.

**П**охвало Соловецкая, священномучениче Иларионе, Церкви Русския светильниче, Патриарха Тихона верный споборниче, крамолы лжеобновителей ревностный обличителю, исцели и ныне раны церковныя.

**П**реподобне отче Алексие, наставников духовных наследниче, учений святоотеческих сокровищнице и многих мученик воспитателю! Не престай Зосимову пустынь хранить и монашество православное в подвизех духовных утверждати.

**Не** солгася пророчество преподобнаго Амвросия, старца обители Оптинския: приемник бо его Исаакий разорения тоя самовидец бывает и, крест свой мужественно прием, в годину лютую смерти за Христа сподобляется.

**Богородичен:** Князю мира, поработити Церковь тщащуся, даже до уз и смерти противосташа отцы святии и все упование свое по Бозе на Дêву Пречистую возложиша.

#### **Песнь 5**

**Ирмос:** *Свет и мир Твой, Христе,/ рабом Твоим подаждь, Блаже:/ Ты бо еси всех мир,/ и союз любви, Человеколюбче,/ Тя познавшим утро светлое,/ и Владыку воистинну, и Господа.*

**С**оборное веление исполняя, святой Патриарх преемники себе указывает, в тайне завещание храня даже до времени преставления своего, и сим показывает лжесоборов бегати, созываемых велением власти безбожных.

**У**мирание тяжкое за Церковь Русскую на всяк день претерпевал еси, Патриарше Тихоне, многожды от безбожных искушаемь, но чист от греха явился еси, паству от волков соблюдый непорочно.

**П**раведно и благочестно житие твое бысть, святителю Кирилле. Аще и во изгнании многая лета пребыл еси, обаче собратий твоих утвердил еси на камени веры Христовы, смерть же твоя в земли пустынной мученичество за веру Православную явился.

**Л**естию и нечестием тщасимся пременити веру святую отеческую противустал еси небоязненно, святе Агафангеле, сего ради изгнан был еси, да уведят вернии, яко время приспе за правду Христову страдати.

**О**, крепосте несокрушимая, святителю отче Петре! Страданием бо лютым Церковь Русскую от раскола хранил еси, яко верный до смерти Патриарха Тихона послушник, не внемля глаголом мучителевым зовущим, еже снити со креста.

**О**, великая обители Соловецкая, колико новомученик в стенах твоих подвиг понесоша и страдания прияша! От нихже святых отцев собора ныне восхвалим: последнего настоятеля Вениамина, в пустынножительстве от злодеев убиенного, архиереи Евгения и Василия, еще же Михаила пресвитера и иныя, и в богословцех изрядна, сим спострадавши, мученика Иоанна.

**К**олькраты незаконнии искаху убити тя, святителю Иоанне, чистоты Православия ревнителя, раскола хульного пензенского обличителя, земли Латвийския теплаго молитвенника, в нейже мученичества венцем украсился еси.

**Богородичен:** Службу Божию в местех потаенных иже за веру страдальцы совершающе, образ Твой, на дщицах и каменех малых писанный и на холстех истканый, о Богомати, яко зеницу ока храняху и благоговейне Тя почитаху.

### **Песнь 6**

**Ирмос:** *Зверю бездны предается/ пророк Иона, глубине морской,/ прообразуя Твое, Слове, тридневное востание,/ тем и взываше:/ из глубины преисподния/ возведи живот мой, Благоутробне.*

**В** лето тридесять седьмое века горькаго велие губительство на Руси бысть, и ови людие насильством умроша, ови же в горьких работах погибоша. Темже, вернии, молитвенно прославим тако умученныя сподвижники святителя Тихона Патриарха.

**Д**ревле в коемждо граде Руси едва един мучитель обреташеся. Како же в лета гонения безбожнаго толика тьма душегубцев вольных воста? Како сыны адовы смерти предати святых воины Христовы не устрашишася?

**В** земли Зырянстей, во граде скорбей зельных, горьких работ, глада и унижения многия муки претерпел еси, священномучениче Анатолие, архиерею Одесский, о нихже послежде самовидцы с плачем поведаша, верность твою Евангелию свидетельствующе.



Самарския пределы, в нихже добльственно потрудился еси, ныне с нами славят многая страдания твоя, архипастырю Александре, заступниче и прибежище гонимых, яко Христа ради и смерть приял еси за други своя.

**Ж**итием и словесы Христа проповедал еси, Серафиме священномучениче предивный, в пределах Холмских, Орловских и Смоленских мудростию и любовию паству уча и от соблазн ограждая. Темже венец тебе терновен исплетется.

**Г**радов России Великия и Малыя проповедницы, Патриарха же Тихона сынове вернии, святителие Никодим и Прокопий достойно да почтутся, иже подвиг служения архиерейскаго, сугубейший подвига, всем верным общаго, мученичеством увенчаша, яко богомудрии.

**С**вященноисповедника пресвитера Василия почтим, во изгнании в пределах Архангельских живот скончавша, священники же Господни прославим, Илию, сострадальца Фаддею, Тверскому архипастырю, Константина же, Вологды молитвенника, убиенныя в годину, кровей исполнену.

**Богородичен:** Законопреступен и смерти повинен, рекоша на Сына Твоего человецы нечестивии, Емуже сострадала еси, Богородительнице Пречистая, такожде и оклеветанныя служители Его, яко Матерь Благоутробная, утешала еси.

### **Кондак, глас 3:**

**Г**онения и страдания даже до смерти претерпевающе/ и православнаго Царства Русскаго разорение обличающе,/ отцы Собора Церкви нашея/ к покаянию чада верная призывают/ и стояти твердо за веру Христову благословляют.

### **Ин кондак Святому Патриарху Тихону, глас 5:**

**С**лужение твое исполнено стона и горя,/ священномучениче Тихоне, Патриарше наш,/ но был еси правило веры и образ кротости,/ побеждая распри и разделения;/ силою смирения и любви Христовы противостал еси злобе сатанинстей,/ возглавил еси доброе воинство новых мучеников,/ Церковь Русскую утвердивших во веки.

### **Икос:**

**Х**отяй Господь верная подвигнути к прославлению подвига святых новомучеников и исповедников Церкви Русския, дом Божий, святителем Владимиром созданный и от безбожных в годину лютых гонений поруганный, благолепно паки возставляет, подвизая в нем икону святых отцев Священнаго Собора изобразити, яко да лики их видяще, поучаются в повестех деяний славных и страданий безмерных всех, святому Патриарху Тихону последующих и именем того в годину гонений нарицаемых. Ихже подвигом мир в Церкви нашей утвердися.

### **Песнь 7**

**Ирмос:** *Отроцы в Вавилоне древле/ во огни не опалишася,/ на муки бо дерзнувшие за веру отеческую,/ в оней непоколеблеми пребыша,/ и зрети Господа и пети Тому сподобившася:/ Избавителю Боже, благословен еси.*

**Н**а месте, идеже ныне храм новомучеников Бутовских устроися, тридесять тысяч юзник в лета злая убиени быша, иже, на смерть за Христа ведоми, верою взываху: Боже, благословен еси.

**С**писателя жития Саровскаго чудотворца священномученика Серафима днесь восхвалим, иже, в болезни сый и старости маститей вскрай рова Бутовскаго мучители приводится и убиение невинно приемлет, воспевая: Избавителю Боже, благословен еси.

**В**ерность храня святителю Петру, в скитании невольнем существу, страдания многая претерпел еси, архипастырю града Владимира, святе Николае, темже и видение лика твоего верным бысть утверждение. Ты же, смерть за Христа доблественне прияти уготовився, зывал еси: Боже, благословен еси.

**Д**несь почитится и пресвитер Сергей, службы Божия усердный рачитель, на путь священства Патриархом Тихоном благословленный, иже, красотою словес церковных окриляемь, посреде гонения лютаго добре шествова и, мученичества достигнув, благодарственно Христу воззва: Избавителю Боже, благословен еси.

**В** премудрости книжней ум изострив, не книжному ученику Петру, верховному апостолу, подражати потщался еси, Иоанне, служителю престола Божия, глас же евангельский, еже отвергнутися себе и взяти крест свой, услышав, со дерзновением на подвиг мученический устремился еси, зовый: Христе, Спасе мира, благословен еси.

**С**ергия преподобнаго от юности послушник изряден был еси, авво Крониде богомудре! Ты бо, попечение усердное о обители Троицстей, яко игумен, являя, о иноцех ея во благоденствии и злоденствии руце молитвенно воздвизал еси, с нимиже ныне во Царствии Божии зываеши: Отче, Сыне и Святый Душе, благословен еси.

**В**о Америке дальней и в первопрестольнем граде Москве святителю Тихону помощника вернаго, Александра пресвитера, почтим, близ гроба патриаршаго к мученичестей кончине призваннаго, свинцем устреленнаго и огнем сожженнаго, ныне же поющаго: Боже, благословен еси.

**Богородичен: О**, Мати Божия, Премилостивая! Кто бы возмогл есть от людей верных узы, биения, унижения и лютую смерть претерпети, аще бы не Ты предстояла еси страждущим, скорби и страдания мученическая утоляющи и научающи пети: Спасителю, Христе Боже, благословен еси.

### **Песнь 8**

**Ирмос:** *Преподобнии Твои отроцы/ в пеци Херувимы подражаху,/ Трисвятую песнь воспевающе:/ благословите, пойте/ и превозносите во вся веки.*

**В**елия страдания претерпели есте, Отечества нашего церковнии избранницы, вы бо воистинну явилися есте, яко соль Земли Русския и утверждение веры Православныя в ней во веки.

**С**ердце твое, о Русь святая, пройде оружие воев германских, твоя пределы пленити восхотевших, обаче сынове твои, жизнь за тебе положившии, вкупе со страдальцы, во узах умученными, Христу песнь нову воспевают во веки.

**И**счислил еси дни страданий и сострадальцев имена, суды Божия благословив, святителю Афанасие, зане, во узах сый, святых русских искусный песнословец явился еси, о новомученицех же почивших молитвенник усердный, с ними Бога славиши во вся веки.

**Ю**нейший от отцев Собора Церкви Русския в пеци гонений искушаемь бывает и яко источник богомудрых учений в земли Владимирстей является, священноисповедник Великодворский Петр, любве Христовы исполненный, яже не изсякнет во веки.

**В**ся по имени помянувше отцы святяты, в лице новомученик прославленныя, и о прочих молитвы вознесем ко Господу, ихже жития и подвиги безвестны суть, да милость улучат от Бога, создавшаго веки.

**М**ощи твоя огнем открываеши, святителю отче Тихоне, Патриарше святой, обаче обрящем ли мощи многих сподвижников твоих, в местех безвестных и непроходных погребенных, ихже память нетленна во веки?

**Богородичен:** Имже пение надгробное никтоже принесе, Сама предстала еси, Чистая, с лики ангельскими; имже незаконное мучительство безвестно кончину уготова, Сама отверзла еси, Препетая, райския входы, да царствуют со Христом во веки.

### **Песнь 9**

**Ирмос:** *Словом Слово Едина Рождаемая, / еретическая уста загради злоречивая. / Ино ново небо, некрадомый рай, Пречистая, / Тя величаем.*

**В** память святителя Тихона Патриарха, сошедшеся, вернии, и вся сподвижники его, иже от собора святых отцев, помянувшие, на месте, идеже тии бяху собрани, Христа величаем.

**Еретическая** злоречивая уста заградившия, святии отцы новомученицы, Соборов вселенских догматы в сердцах ваших сохранили есте, темже вас величаем.

**Святая** Руси соборы престаха иногда, с патриаршеством упразднившиеся вкупе, но глас соборный, яко крин, посреде камене прозябший, в годину бедствия возвестися.

**У**стами пророк, Господи, Израиля наставляя, людем, пророки избившим, царя поставляеши; людем же, православнаго царя отвергшим, гонения посылаеши, да воли Твоя познание покаянием обрящут.

**Церкве** уставы соборне определившие, послежде же сию гонимую видевше, судьбам Божиим неспостижимым удивистесь, о святии отцы новомученицы, подвиги своими Христа возвеличившии.

**Нарекли** есте прозорливо, святии отцы, страдальцы за веру Христову новомученики и исповедники Церкви Русския и память ежелетнюю сим уставили есте. Ныне же с ними вкупе величаетесь.

**Отче,** Сыне и Душе Всесвятый, призри с Небесе на Церковь Русскую, в правой вере сию соблюди, да и мы, чада ея, воистину Тя величаем.

**Богородичен:** Догматы хранити и заповеди Христовы с любовию творити настави нас, Богоневесто Владычице, да и мы, веру непорочно соблюдоше, в Царствие Божие вход улучити возможем.

### **Светилен:**

**Свет** Отца и Сына, и Духа Святаго / вселися в души ваша, о святии отцы Священнаго собора, новомученицы и исповедницы, / сего ради память вашу со святителем Патриархом Тихоном вкупе прославляем.

### **Слава, и ныне, Богородичен:**

**Свет** Христов явися всем Тобою, Мати Дево, / вселися бо во утробу Твою Слово паче слова, / сего ради род наш песньми немолчными Тя величает.

### **На хвалитех стихиры, глас 5.**

#### **Подобен: Радуйся:**

**Радуйся,** святителю отче наш Тихоне, / паче жизни паству твою возлюбивый / и душу твою за чада церковная положивый, / к ним же со скорбию тяжкою взывал еси: / сердце мое горит жалостию до смерти: / очиститесь, братие, от грехов своих, / и будем вкупе молити Господа: / Отче наш, остави нам долги наша.

**Р**адуйся, святой патриарше наш Тихоне,/ ты бо, Церковь Русскую на подвиг Христов укрепляя/ и новое воинство Христово собирая,/ верою, любовью и кротостию/ злобу вражью побеждати научал еси/ и во смирении силу Божию стяжати наставлял еси./ Буди и нам ныне воевода взбранный,/ молим тя, пастырю наш добрый,/ и не остави чад Твоих во веки.

**Глас и подобен тойже:**

***Творение святителя Афанасия Ковровскаго.***

**П**риидите, Небеснии предстателие наши, к нам,/ вашего требующим милостивнаго посещения,/ и избавите ны, озлобленныя мучительскими прещении,/ лютаго неистовства безбожных,/ от нихже яко пленницы и нази гоними есмы,/ от места на место часто преходяще,/ и заблуждающе в вертепех и горах./ Ущедрите убо, прехвальнии,/ и даруйте нам ослабу,/ утолите бурю,/ и угасите еже на ны негодование,/ Бога моляще,/ подающаго вами земли нашей велию милость.

**Ины стихиры, глас 4.**

**Подобен:** Дал еси знамение:

**В** память святых отцев сошедшеся,/ на месте, идеже тии бяху собрани/ в годину испытаний Земли Русския,/ воспоим Христовых воинов полк,/ братство же святое,/ строителей дела церковнаго,/ страдальцев за веру лик Небесный,/ и сим наставником нашим да подражаем,/ в Духе и истине их почитающе.

**О**, неизреченнаго Твоего смотрения, Христе!/ Како жизни церковныя устроителие/ плач Иеремиин восприемлют,/ храмы зряще разрушаемы?/ Како святителие и иереи/ от престолов Божиих во узилища отсылаются/ и тамо, якоже на реках Вавилонских,/ о служении слезы проливают?/ О, неизследимых судеб Твоих, Христе,/ имиже спасение душ наших содеваеши!

**В**зыграйте, людие,/ в день памяти Христовых страдальцев,/ ихже ради вера не погибе,/ но паки процвете в земли нашей./ Темже и мы, в дом Божий сошедшеся,/ с любовью возопиим:/ молитесь о нас,/ отцы святии,/ да пробавит Господь нам милость Свою.

**Слава, глас 1:**

**О**, святии отцы, многих церковных дел устроителие,/ вы, главу православных являюще,/ патриаршество возстависте,/ праздник Русских святых радостне возобновисте,/ новых мучеников память учинисте,/ пастве Церкви Русския путь подвига исповеднаго указасте/ и на защищение святынь церковных и пастырей гонимых вся призвасте,/ послежде же и сами крест мученичества приясте./ Темже к вам усердно взываем:/ сподобите нас любви и веры ваша наследники быти.

**И ныне, глас тойже:**

**Ц**еркве Христовы Хранительнице,/ Мати Божия Пречистая,/ сохрани в чистоте веру нашу,/ молитвы бо святых отцев наших Тебе предлагаем,/ зане верная чада Твоя суть,/ яко заповеди Сына Твоего непорочно соблюдоша.

**На Литургии**

**Блаженна от канона святых отец, песнь 3-я и 6-я. Прокимен, глас 7: Бог нам Прибежище и Сила. Стих: Помощник в скорбех, обретших ны зело. Апостол к Римляном, зачало 99 (гл. 8, 31-39). Аллилуиа, глас 4: Воззваша праведнии, и Господь услыша их, и от всех скорбей их избави их. Стих: Многи скорби праведным, и от всех их избавит я Господь. Евангелие от Луки зачало 105-106. Конец: В**

терпении вашем стяжите душа ваша (глава 21, 8-19). Причастен: Радуйтесь, праведнии, о Господе, правым подобает похвала.

**Молитва святителю Тихону,  
Патриарху Московскому и всея Руси, исповеднику**

**О**, пастырю добрый, святителю отче наш Тихоне, Патриарше Церкви Русския! Ты многия труды в жизни временней подъял еси. Простота и любви твоя, дух мирен и кроток, таже и слово, благодати исполненное, по сердцу быша людем земли нашея, иже и предложиша тя Богу на подвиг великий и многотрудный. Егда же богоборцы и хулителие воздвигоша на Церковь Христову гонение, емуже не бе равнаго от века, Сам Господь Вседержитель избра и содела тя Патриарха. Ты же, святителю, сраспинаяся Христу и Церкви Его, со скорбию люди к покаянию призывал еси. И кто изочтет страдания твоя? Заточение бо темничное, клеветы и суды гонителей со смирением претерпевая, врагом Христовым молитвою слезною и кроткою противустал еси и архиереи, пресвитеры, монахи и мирския на подвиг мученический благословил еси.

Темже молим тя, святителю Христов, буди нам дерзновенный заступник и не остави ны, немощная чада твоя. Испроси у Господа нам грехов прощение, веры утверждение, скорбей ослабу, помыслов чистоту, да, в покаянии и молитве пребывающе, украсим себе целомудрием, любовью и смирением, и тако Царствия Небеснаго достигнем, идеже с тобою сподобимся прославляти Святую Троицу, Отца и Сына и Святаго Духа. **Аминь.**

**Ина молитва  
святим отцем, на Соборе Церкви Русския потрудившимся**

**О**, святии угодницы Божии, сонма новых мучеников и исповедников Церкви Русския причастницы, на Соборе Церкви Русския в годину скорби добре потрудившиися и мужески за веру Христову в лета гонения лютаго пострадавшии! Поминающе труды на ниве Божией, вами подъятыя, и подвиги во страдании за веру свершенныя, славословим добродетели ваша, воспеваем братолюбие, прославляем любовь ко Спасителю Христу и Церкви Его Святых, и, яко чада ваша по духу, молим: научите нас разум евангельский прилежне стяжати, на всякое дело благое потребен, помозите во испытаниих крепость веры имети, сподобите нас наследники подвига вашего быти, да неосужденно Царствия Божия достигнем, идеже купно с вами прославим Троицу Единосущную во веки веков. **Аминь.**

**Стихиры, поемая по обычаю в 5-й день ноября в домовом храме святых  
отцев Поместнаго Собора в Московстем епархиальнем доме**

**На Господи, воззвах: стихиры, глас 1.**

**Избранный** на путь крестный и исповедный,/ святой Патриарх да восхвалится днесь,/ иже с паствою своею чашу мученичества испи за веру Православную,/ воззовем ему: святителю отче наш Тихоне,/ прииди и осени благословением небесным/ Богом собранныя люди твоя.

**Войны и глад и кровавая смута/ жребий твой тяжкий, святителю наш!/  
Ты же, в покаянии путь спасения нам указуя, звал озлобленныя:/ возлюбите ближняго своего,  
обратитесь ко Господу и спасетесь.**

**Взываю к вам, архипастырие и пастырие,/ вещал еси, святе Тихоне, Патриарше наш:/ сыны мои и дщери во Христе, спешите с проповедию покаяния,/**

противостаните врагом Церкви силою веры нашея./ Зовем вы на страдания вместе с собою/ святого апостола словесы:/ кто ны разлучит от любви Божия?

**Страдания** многая претерпел еси, отче Тихоне:/ клеветы, суды, заточения,/ предательства лжебратий и угрозы смертныя,/ насильства и нападения врагов Церкви Христовы;/ но ты пребыл еси мужествен и кроток, вещая:/ не ожесточайте сердец ваших,/ но возмогайте о Господе!

### **На стиховне, глас 1.**

**Подобен: Небесных чинов:**

**Воли** Божия праведный искателю и поборниче,/ отче Тихоне, молитвенниче пламенный за Церковь и Землю Русскую,/ любви Христовы святой и кроткий подвижниче,/ заступниче безстрашный невинно страждущих!/ Пророчеств твоих видедем страшное событие./ Моли спастися душам нашим.

**Стих:** Господи, Господь наш,/ яко чудно имя Твое по всей земли.

**Простоту**, мир и кротость с любовью/ возгревал еси в сердце твоём, отче Тихоне,/ молитвою тихою ограждал еси стадо Христово/ от волков, губящих е.

**Стих:** Возношения Божия в гортани их,/ и мечи обоюдоостры в руках их.

**Светлым** облаком страдальцев Христовых,/ ихже на подвиг укрепил есть Собор Церкви Русския,/ Небеса небес освящают нас,/ сошедшихся в память святых соборян во храм,/ идеже тии с Патриархом Тихоном воспеваху:/ днесь благодать Святого Духа нас собра.

### **На хвалитех стихиры, глас 5.**

**Подобен: Радуйся:**

**Радуйся**, святейший отче наш Тихоне,/ возлюбивый больше жизни паству твою/ и положивый душу свою за Церковь Божию, за Божий народ,/ к нему же со скорбию тяжкой взывал еси:/ сердце мое горит жалостию до смерти./ Очиститесь, братие, от грехов своих/ и будем вместе молити Господа:/ Отче наш,/ остави нам долги наша.

**Радуйся**, святой патриарше наш Тихоне,/ укрепляя Церковь Русскую на подвиг Христов,/ собирая новое Христово воинство,/ научая верой и любовью/ в кротости побеждати злобу вражию,/ во смирении стяжати силу Божию./ Воевода взбранный ныне снова буди нам!/ Молим, пастырю любимый наш:/ не остави чад Твоих во веки.